

Na osnovu člana 19. stav 2. Zakona o Vladi Federacije Bosne i Hercegovine ("Službene novine Federacije BiH", broj 1/94, 8/95 i 58/02, 19/03, 2/06 i 8/06), a u skladu sa članom 20., 21. i 52. Zakona o udruženjima i fondacijama ("Službene novine Federacije BiH", broj 45/02), na prijedlog federalnog ministra kulture i sporta, Vlada Federacije Bosne i Hercegovine, donosi,

## **ODLUKU O OSNIVANJU FONDACIJE ZA IZDAVAŠTVO**

### **I**

U cilju podsticanja, stimulisanja, razvoja i unapređivanja stvaralaštva u lancu časopisa, knjige i elektronskog izdavaštva na teritoriji Federacije Bosne i Hercegovine, te održavanja kreativnosti i kulturne i jezičke raznovrsnosti kao uslova pluralističkog izražavanja, Vlada Federacije Bosne i Hercegovine (u daljem tekstu: osnivač), osniva Fondaciju za izdavaštvo (u daljem tekstu: Fondacija).

Svrha Fondacije je stabilizacija i poboljšanje opštih uslova i raznovrsnosti autorstva u lancu časopisa, knjiga i elektronskog izdavaštva.

### **II**

Naziv Fondacije je: Fondacija za izdavaštvo.

Sjedište Fondacije je u Sarajevu, Obala Maka Dizdara broj 2.

Fondacija ima svojstvo pravnog lica.

Fondacija ima administrativnu, tehničku i finansijsku samostalnost.

Fondacija djeluje na prostoru Federacije Bosne i Hercegovine.

### **III**

Osnovni cilj Fondacije je podsticanje, stimulisanje, razvoj, unapređivanje i modernizacija izdavaštva a naročito u domenu:

- stvaralaštva pisaca, prevodilaca, dizajnera i kolektivnog stvaralaštva u izdavaštvu,
- objavljivanje knjiga, časopisa publikacija orijentisanih prema kulturi,
- distribucije i prodaje knjiga i elektronskog izdavaštva,
- promovisanja knjiga i elektronskog izdavaštva,
- stimulisanja stvaralaca, institucija, udruženja i asocijacija,
- tehnoloških inovacija u sektoru izdavaštva,
- očuvanja kulturnih vrijednosti,
- projekata naučno-istraživačkog karaktera,
- gostovanja stvaralaca u inostranstvu,
- edukacije kadrova,

- povezivanje i razmjena informacija i iskustava sa sličnim asocijacijama van granica Federacije BiH,
- nekomercijalnih projekata,
- učestvovanja u utvrđivanju politike koja unapređuje izdavaštvo.

#### **IV**

Fondacija se osniva na neodređeno vrijeme.

#### **V**

Sredstva za rad i ostvarivanje ciljeva Fondacije osigurat će se u Budžetu Federacije Bosne i Hercegovine godišnjim Programima Vlade u okviru transfera Federalnog ministarstva kulture i sporta.

#### **VI**

Imovinu Fondacije čine:

- dobrovoljni prilozi i pokloni fizičkih i pravnih lica;
- sredstva dodijeljena iz Budžeta Federacije Bosne i Hercegovine;
- prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- drugi prihodi stečeni u skladu sa Zakonom i statutom.

#### **VII**

Organ upravljanja Fondacijom je Upravni odbor.

Upravni odbor čine predsjednik i dva člana.

Predsjednika i članove Upravnog odbora imenuje osnivač iz reda stvaralaca, naučnih, kulturnih i drugih javnih ličnosti, na prijedlog federalnog ministra kulture i sporta.

Predsjednik Upravnog odbora je ovlašten za zastupanje i predstavljanje Fondacije.

#### **VIII**

Osnivač će imenovati predsjednika i članove Upravnog odbora u roku od 30 dana od dana stupanja na snagu ove Odluke.

#### **IX**

Stručne službe Federalnog ministarstva kulture i sporta i lice koje ovlasti federalni minister kulture i sporta, podnijet će prijavu s dokumentacijom i izvršiti druge radnje potrebne za izmjene upisa u Registar fondacija kod nadležnog organa.

## **X**

Poslove zastupanja i pravne zaštite imovine i imovinskih interesa Fondacije, obavlja Federalno pravobranilaštvo.

## **XI**

Danom stupanja na snagu ove Odluke prestaje da važi Odluka o osnivanju Fondacije za izdavaštvo ("Službene novine Federacije BiH", br. 53/00 i 43/03).

## **XII**

Ova odluka stupa na snagu danom donošenja a objavit će se u "Službenim novinama Federacije BiH".

V broj: 899/2007  
Sarajevo, 19. 12. 2007. godine

Premijer  
dr. Nedžad Branković